

Fortezza demolida e restaurada

Guardiana da la via alpina a Mesauc

DA GUIU SOBIELA-CAANITZ

■ **«Cur che nus gievan a scola, ans han ins preschentà noss chastè sco insatge che per noss babuns haja muntà il mender da tuts mals e ch'ins haja destrui cun tutta raschun».** Quai scriva Riccardo Fasani, president communal da Mesauc, en la prefaziun dal davos numer dals «Quaderni Grigionitaliani», deditgà al chastè da sia vischnanca (1). Pertge, cur e co han ins demoli lez chastè? Quai rapporta Augustin Carigiet dal Servetsch archeologic chantunal: «Il signuradi da Mesauc fascheva part da las Trais Lias dapi 1480. 1526 hani ordinà da demolir ses chastè. Ins leva impedir ch'in inimi penetrass en quella fortezza e la duvrass sco basa militara. Ins l'ha rumida; la mobiglia han ins vendì u tramess al Palazi Trivulzio da Roveredo. Lur han ins devastà cumplettaimain il bajetg. Da quai dattan perditga anc oz la sfessa gronda en il mir da tschinta ad ost e las pitschnas turs externas ch'ins na pudeva pli duvra pervi da la demoliziun parziala. Er aifer il bajetg han ins destrui ils spazis d'abitare e da represchentaziun (...). Lur han ins demoli la tur principala e la fatschada sid dal palaz» (p. 157). Pir en il tschientaner passà «han ins pers la tema ch'i pudess turnar in signur feudal»: Quai scriva l'istoricher Luigi Corfu (p. 142). 1922–1926 han ins rinforzà ils mirs dal chastè sut la direcziun da l'architect basilais Eugen Probst (1873–1970); lura n'han ins pli fatg nagut. Il president rapporta: «1980 han ins festivà ils 500 onns d'appartegnientscha da Mesauc e Soazza a la Lia Grischa. Cun quella occasiun han ins mess ad ir la restauraziun ed il rinforz da las ruinas dal chastè. En blers lieus eran ils mirs en in stadi vaira critic (...). L'unica via per segirar ina tgira permanenta da la fortezza è da dar enavos in senn ed ina finamira a lez intschess fascinants. I na sa tracta pia betg mo da restaurar ils mirs e d'impedir lur decadenza, mabain era da revalitar l'entira cuntrada areguard la cultura ed il turissem (...). Las lavurs fategas pussibilitesch da segirar la stabilitad e tgira da la fortezza e miran er a simplifitgar ses mantegniment ordinari» (pp. 228–230). Ins giavischass anc ina restauraziun da sia chapella, cunzunt dals frescos da la paraid nord che mussan il ciclus dals dudesch mais.

Rempar antic cunter ils Alemans

Pertge e cura èn ins vegnì adaquella d'eriger ina fortezza a Mesauc? Corfu declera: «Il Bernardin è in dals paucs pass alpini restads ordvair relevants tras tuttas epocas. La via collia la vallada dal flum Tessin cun quella dal Rain senza veritabels impediments natirals (...). Per ir vinavant vers nord, pon ins tscherner tranter almain trais vias pussaivlas, numnadamain il Culom Val [da Valragn a Val S. Pieder], il Piz Calandari [da Spleia a Stussavgia], la Püntcrap e la Viamala [da Sur (Valragn) a Tusaun]. Mo tranter Mesauc e Soazza, anetgamain, ston tuts percurs s'integrar en la foppa a vest dal chastè, sch'ins na vul betg ir si per trutgs taiss» (p. 127). Indizis laschan sminar ina colliazion tranter la Mesolcina ed il Rain posteriur gia per la fin dal quart millenni a. C. u l'entschatta dal terz. Sper Mesauc han ins chattà «staggias da cheramica sumegliantas als chats da Castaneda, Tumein e Cazas» (p. 128). Gia per l'epoca romana tardiva, tranter 257 e 477 s. C., han ins chavà or «in rempar da terra che traversava l'inclinaziun a vest dal chastè (...). Philippe Della Casa smina ch'ins possia metter en relaziun il complex cun il sistem roman tardiv da defensiun numnà 'Tractus Italiae circa Alpes' (...). Il mir han ins probablmain erigì en prescha, ma sa basond sin ina ducrina militara precisa (...). Gia enturn 200 s. C. han pievels germans entschavì ad invader l'Imperi roman. Ils Alemans, vegnend giu dals pass alpini, han devastà pliras giadas la Lombardia. [L'imperatur



Il signuradi da Mesauc fascheva part da las Trais Lias dapi 1480. 1526 hani ordinà da demolir ses chastè. Ins leva impedir ch'in inimi penetrass en quella fortezza e la duvrass sco basa militara. MAD

Caius Valerius] Diocletianus ha reorganisà il stadi, assegnond a Milaun il rang da citad imperiala; questa è stada pelvaira chapitala da l'Imperi dal vest tranter 266 e 402. Amez il quart tschientaner han ins chapì che Milaun n'era tuttina betg protegì cunter las attatgas germanas adina pli frequentas. Lur han ins tschernì la defensiun la pli efficazia, numnadamain la strategia 'elastica' (...) d'ina rait da stretgas che, almain davent dal quart tschientaner, fermavan ils access principals tras las Alps (...). Quellas 'clausurae' eran fortificaziuns che duevan occupar e stanclentar ils agressurs per franar lur avanzada, dar refugi a la populaziun ed annunziar il privel a l'armada romana dischlocada en la planira [dal Po]» (pp. 131–132). Corfu menziuna anc ina tur «che cumandava la rait da signals; ses relais era la tur da Baggiano. Questa n'era apostata betg erigida nua che la vista è la pli vasta, (...) mabain en ina posiziun nua che l'egl mantegna il contact cun Mesauc ed a medem temp cun la stretga da Roveredo e cun il chastè da Castione/TI. Da là gieva la communiacziun probablmain sur Blizuna, Ascona e Pallanza fin a Milaun» (p. 134).

Il chastè feudal

La Mesolcina è stada possess langobard tschientaners a la lunga. Carl il grond († 814), il «bab da l'Europa», «ha sutta-mess ils Langobards e fixà il cunfin nov dal contadi da Rezia a Monticello [sper San Vittore] (...). L'Italia finiva pia a Lumino; quest toponim (per dialect 'Limen') deriva forsa da 'limen' ('cunfin')» (p. 134). En il 12avel tschientaner han ils baruns da Sacco erigì ina tur ed in mir da tschinta, en il 13avel in bog, enturn 1400 in grond palaz; lur hani dauzà il mir da tschinta da 2 m e schlargià la fortezza encunter nord. Lez bog dal 13avel tschientaner «è ina da las paucas perditgas da tgira corporala ord il temp me-

dieval tardiv» (Carigiet, p. 167). En la segunda mesad dal 15avel tschientaner han ils Sacco stui vender la vallada al duca da Milaun. 1480 ha la Lia Grischa acceptà l'adesiun da Mesauc e Soazza; sin quai ha Milaun vendì il chastè al «condottiere» lumbard Gian Giacomo Trivulzio (1442–1518) ch'è vegnì sez 1496 commember da la Lia Grischa. Corfu: «L'acquist muntava ristgs politics e militars pervi da problems cun [duca] Ludovic 'il Moro', cun la gliued da Mesauc, la famiglia Sacco, las Trais Lias, ils Svizzers e l'imperatur. Ins encliega pia che Trivulzio, strusch en possess dal chastè medieval (5 da schaner 1481), ha vuli immediat metter ad ir lavurs per al transfurmar en ina da las fortezzas las pli ablas da sa defender (...). I sa tractava d'in mir spess 1,80 m ed aut 7,20 cun balestreras, pia uschè spess sco la miraglia da Clavenna erigida davent da 1487» (p. 139). En il chastè stevan 1503 tredesch chanuns («spingarde»). Trivulzio ha tratg a niz las guerras da Lombardia tranter Frantscha, Sontg Imperi roman e Svizzers. Sco marschal da Frantscha ha l'gidà retg Francesco (1494–1547) a batter ils Svizzers a Marignano. Ma pli tard han las Trais Lias ed ils Svizzers consolidà lur domini en la Mesolcina e quai che furma oz il chantun Tessin. Trivulzio era oramai mo pli in disturbi che la Lia Grischa ha eliminà destruid il chastè.

Il commerzi da laina

Andrea a Marca, istoricher da Mesauc, ha deditgà sia lavur da docter (2) ad in'activitad mesolcinasa relevanta dal 15avel al 19avel tschientaner. Las cumnanzas da la vallada smerschevan laina ch'ins flottava giu la Moesa ed il Tessin, enfin al Lago Maggiore e lur en l'Italia dal nord. A Marca citescha in autur da 1603: «Las valladas che conflueschan sur Blizuna, numnadamain la Leventina, la

Val dal Blegn e la Mesolcina, han fitg blers gauds da lareschs, pins ed autras plantas ch'ins po duvra per far arbers da bartgas grondas, galeras e cunzunt travs per bajegiar chasas. Lezza laina vegn transportada sin l'aua fin a Lucarn e ses conturns, e da là a Milaun, Pavia, Cremona, Vaniescha e tuttas parts da l'Italia» (p. 42). La laina cuntanscheva il lai sper la sbuccada dal flum Tessin, pia a Magadino. A Marca: «Bunamain l'entira laina arrivada a Magadino era gia vendida avant sia partenza; ils cumpraders eran gliued dals vitgs sper il lai, cunzunt Brissago, Cannobio ed Intra, u da las citads lumbardas da Milaun e Pavia. Quellas firmas grondas (...) entravan en relaziuns, savens onns a la lunga, cun impressaris mesolcinai. Ils frars Clerici d'Intra, per exempel, han (...) pustà grondas quantitads da laina da Calanca e Mesauc durant ils onns veng dal 19avel tschientaner, e da la Val Cama [ad ost da Cama] en ils onns trenta» (p. 219).

Relaziuns da vischinanza encunter l'ost

Mesauc aveva relaziuns da vegl ennà cun la Val s. Giatgen e Clavenna, grazia al Pass da Balniscio (2353 m), oz en la vischnanca lumbarda da Madèsimo. L'istoricher Guido Scaramellini (Clavenna) rapporta en il numer gia cità dals «Quaderni Grigionitaliani»: «Clavenna e Mesauc litigiavan gia 1203 areguard l'alp da Rasdeglija [oz en la vischnanca da Madèsimo, G. S.-C.]. 1237 ha l'imperatur Fadri [il Federico da Giovanni Netzer] battì las citads lumbardas a Cortenova; lur ha Clavenna fatg pasch cun il barun Sacco (...). Dapi 1266 deva Mesauc alps a fit al vitg d'Isola; quai han ins confermà 1272, 1279, 1430, 1461 e 1472 (...). Ils 26 da fanadur 1906 ha Mesauc pruvà da prender enavos l'Alp Borghetto [sper il Balniscio] sequestrond 12 chavals e 200

nursas. La stad 1910 han ins stgaffì ina cumissiun maschadada taliana-svizra per fixar il cunfin statal. 1927 han ins finalmain tschentà dus terms tranter ils dus stadis a la Serraglia, e puspè 1930 in term a la Conca» (pp. 187–190). Ma la via istoricamain la pli relevanta tranter Mesauc e Clavenna era quella da la Fòrcola (2257 m) davent da Soazza. Scaramellini: «1499 han var quaranta schulds mesolcinai tschernì lezza via per turnar a chasa da Chalavaina (...). I eran gia ids da Roveredo sur quel pass cun chanuns da Trivulzio (...). Da 1608 datescha ina tariffa da dazi 'sur il culm da Soazza per mintga arment, per ils chavals e per mintga chamel, elefant [sic!] ed auter animal grond' (...). En il 17avel tschientaner è la tensiun creschida tranter Grischun e Spagna; la rauba da e per la republica da Vaniescha, alliada da las Lias, viaggiava sur il Pass Son Marc a nord da Bergamo, lura Morbegn e la Fòrcola (...). Davent da 1700 mantegnèvins avert quest pass era d'enviern cun far ora la naiv (...). Quai è stà la via dal surdoder Giovan Antonio Felicetti da Soazza, fatschentà 1698 e 1713 en la baselgia da Novate Mezzola [sper Clavenna] e 1699 en la baselgia da sontga Maria a Clavenna (...). 1728 ha l'expertisa davart la surdorada (...) vi da la tavola da l'altar d'Isola entagliada da Giovanni Ritz, bab e figl, da Selkingen/VS» (pp. 191–193). I sa tracta da Johann Ritz (1668–1729) e da ses figl Johann Jodok (1697–ca. 1780), dal Gomstal sco pli tard il famus hotelier Cäsar Ritz (1850–1918). En la baselgia parochiala da Mesauc stat ina plachetta ovala d'argent massiv cun la vopna da la schlatta a Marca ed ina dedicaziun da la citad e dretgira da Clavenna a ses derschader da 1789 a 1791, Giovanni Antonio a Marca da Mesauc. Ma il viandant il pli renumà da la Fòrcola è stà 1793 duca Louis Philippe da Chartres (1773–1850), descendent da retgs franzos e desertur da l'armada republicanica. Suentar ina notg en il fain a Gordona [sper Clavenna] è l'arri-và la saira a Soazza. Pli tard è l'ist magister da matematica, talian ed inglais a La Punt sper Tumein, en il seminari da Johann Baptist von Tscherner (1751–1835). Suentar Waterloo è l'turnà en Frantscha, nua ch'el è stà il davos retg.

Collavurar sur ils cunfins

Scaramellino concluda: «I dat blers lioms tranter las valladas da Clavenna e la Mesolcina (...). Oz bandun'ins las terras autas e la tragda da muvel; l'economia na dependa pli da las pastgiras ed ins na litigia pli per las duvras. Ins sto collavurar il pli pussaivel. Ils transports vegnan adina pli svelts. En il segund ed il terz decenni dal 19avel tschientaner han ins avert ils straduns da Spleia e dal Bernardin; la via internaziunala da la Fòrcola è lur ida en paglia (...). Oz discurrev'ins da colliar Gordona e Lostalio cun ina viafier; quai munta ina dumonda delicata cun avantatgs segirs, ma era grevas sfidas per l'ambient. En mintga cas ston las populaziuns d'omaduas varts, cun problems analogs, collavurar adina pli stretgamain. I vul cunzunt dapli avertura umana e culturala per surmuntar las barrieras politics ed administrativas. Las instituziuns istoricas e culturalas e las relaziuns tranter persunas van en questa direcziun» (p. 28). Quai fa era quel remartgabel numer 2/2010 dals «Quaderni grigionitaliani», sco gia «Facevano case», il davos volum da Diego Giovanoli (v. La Quotidiana dals 11 da zercladur 2010), ubain la collavuraziun tranter Landeck, il Vnuost, la Val Müstair e l'Engiadina Bassa.

1) Quaderni grigionitaliani 2/2010. Castello di Mesocco passato e futuro. ISBN 88-85905-80-3. Addressa: Giuseppe Falbo, Pro Grigioni Italiano, Martinsplatz 8, 7000 Cuir.
2) Andrea a Marca, Acque che portarono. Il commercio del legname dal Moesano al lago Maggiore fra 1700 e 1850. CH-6527 Lodrino/TI (Edizioni Jam) 2001.